

आकाशवाणी जयपुर-अजमेर

प्रादेशिक समाचार

दिनांक 15.03.2025

समय: 18.45 बजे

- केन्द्रीय कानून मंत्री अर्जुनराम मेघवाल वन नेशन वन इलेक्शन ने चुनाव सुधार की दिशा में खास कदम बताया।
- मुख्यमंत्री भजनलाल शर्मा कह्यो-सरकार महिलाओं ने आगे बधावण अर मजबूत करण सारू संकल्पित रहे र काम कर रही है।
- विश्व उपभोक्ता अधिकार दिवस के मौके प्रदेशभर में न्याया-न्याया जागरूकता कार्यक्रम राख्यी ज्यो।
- पद्म पुरस्कार 2026 सारू आज ऑनलाइन नामांकन सुरू रह्यो।

000

केन्द्रीय कानून मंत्री अर्जुनराम मेघवाल वन नेशन वन इलेक्शन ने चुनाव सुधार की दिशा में खास कदम बताया है। खबरनवीसों सागे बातचीत करता थकां मेघवाल कह्यो के देश में एके सागे चुनाव रहेवणो संघीय ढांचा माथे किण ई भांत रो प्रहार नी है।

वे आज जयपुर में एक गैर-सरकारी विश्वविद्यालय में नुवा विधि भवन रो उद्घाटन कीनो। ई मौके वे कानून अर धर्म मुद्दा माथे व्याख्यान ई दीनो। कार्यक्रम में राजस्थान हाईकोर्ट रा न्यायाधीश अनिल कुमार उपमन अर जयपुर की सांसद मंजू शर्मा समेत जनता रा कई नुमाइंदा ई मौजूद हा। ई रे अलावा मोटी तादाद में विश्वविद्यालय रा शिक्षक अर विद्यार्थी ई शिरकत कीनी।

000

मुख्यमंत्री भजनलाल शर्मा कह्यो है के राज्य सरकार महिलाओं ने आगे बधावण अर वॉ ने मजबूत बणावण सारू लगातार काम कर रही है। वे आज जयपुर रा जवाहर कला केन्द्र में सुरू रह्यो शक्ति वंदन महोत्सव में बोल रह्यो हा। श्री शर्मा कह्यो के राजीविका ऊं जुड़ी महिलाओं लखपति दीदी बणे है अर वॉ रा सामान बणावे है। इण ऊं वॉ ने माली सम्बल मिले है। मुख्यमंत्री कह्यो के राज्य सरकार राजीविका रा उत्पाद खरीद रही है, ताकि महिलाओं ने बाजार मिल सके अर वे मजबूत बण सके।

कार्यक्रम में जयपुर की सांसद मंजू शर्मा अर जयपुर नगर निगम ग्रेटर की महापौर सौम्या गुर्जर ई मौजूद रही। सशक्त नारी, समृद्ध समाज मुद्दा माथे राख्यो जा रह्यो तीन दिन रा ई महोत्सव में स्वच्छता योद्धाओं की टाबरियां ने सर्वाइकल कैसर ऊं बचाव रो मुफ्त टीको लगायो जा रह्यो है। महिलाओं अर टाबरियां सारू खुद की हिफाजत की सिखावण देवण रा शिविर ई लगायो जा रह्यो है। ई मौके आत्मनिर्भरता की दिशा में एक कदम थीम माथे तीन सौ स्टॉल्स ई लगायी ज्यी है।

000

भारतीय रिजर्व बैंक-आरबीआई ने ब्रिटेन मांय सेंट्रल बैंकिंग रा डिजिटल ट्रांसफॉर्मेशन अवॉर्ड 2025 सारु चुण्णी ज्यो है। आरबीआई ने **प्रवाह** अर **सारथी** नाम री डिजिटल पहलां सारु नवाज्यो जावेला। पुरस्कार समिति रे मुजब आं डिजिटल पहलां ऊं कागज़ रा इस्तेमाल मांय कमी व्ही है। जनवरी 2023 मांय सरु करीजी सारथी पहल ऊं रिजर्व बैंक मांय अंदरुनी कामकाज डिजिटल व्हे ग्यो, जिण ऊं कर्मचारी सुरक्षित तौर ऊं कागजात ने संग्रहीत अर साझा करण मांय सक्षम बण ग्या। ग्राहकां सारु मई 2024 मांय प्रवाह रा तौर ऊं चलायी ज्यी दूजी पहल ऊं हाल ताई 70 ऊं बत्ता न्यारा-न्यारा विनियामक अनुप्रयोगां ने डिजिटल बणावण री मंजूरी दीरीजी है।

000

भारतीय अंतरिक्ष अनुसंधान संगठन-इसरो एल वी एम-थ्री प्रक्षेपण यान एलवीएम-एम सिक्स रा छठा मिशन माथे जावण वाळा क्रायोजेनिक इंजन री फ्लाइट एक्सेप्टेंस हॉट टेस्टिंग कामयाबी सागे पूरी कर लीनी है। आ जांच तमिलनाडु रा महेंद्रगिरि मांय इसरो प्रोपल्शन कॉम्प्लेक्स मांय करीजी। प्रक्षेपण वाहन मार्क-तीन रा रूप मांय पिछाण्यो जावण वाळो एल वी एम-थ्री इसरो कानी ऊं विकसित करी ज्यो तीन-चरण रो मध्यम-लिफ्ट प्रक्षेपण यान है। इसरो कानी ऊं जारी बयान रे मुजब नुवी परीक्षण पद्धति क्रायोजेनिक इंजन री फ्लाइट एक्सेप्टेंस टेस्टिंग सारु जरूरी सेटअप समय अर कोशिश ने कम कर देवे है।

000

केन्द्रीय उपभोक्ता मामलात् मंत्री प्रल्हाद जोशी कह्यो के सरकार ग्राहकां ने भरमावण वाळा दावां ऊं सावचेत राखण अर वां मांय जाग-जगावण सारु लगातार काम कर रही है। श्री जोशी विश्व उपभोक्ता अधिकार दिवस रे मौके आज राख्णी ज्यी वेबिनार मांय वीडियो कान्फ्रेंस रे मार्फत बोल रह्या हा। श्री जोशी कह्यो के सरकार न केवल ग्राहकां ने बचावण बल्कि वां री समृद्धि माथे ई ध्यान दे रही है। विश्व उपभोक्ता अधिकार दिवस हर साल 15 मार्च ने ग्राहकां रा मूल अधिकारां ने बधावो देवण अर वां ने बचावण सारु मणायो जावे है। इण री ई साल री थीम है – **सतत जीवन शैली के लिए न्यायोचित परिवर्तन**। विश्व उपभोक्ता अधिकार दिवस रे मौके प्रदेश मांय ई जागरुकता कार्यक्रम राख्णी ज्यो। आज उपभोक्ता जागरुकता सप्ताह री ई सरुआत व्ही। सप्ताह रा पैला दिन आज झुंझुनूं मांय रंगोली रे मार्फत उपभोक्ता हेल्पलाइन नम्बर 1 9 1 5 री आकृति बणायी ज्यी। जिला उपभोक्ता आयोग रा अध्यक्ष मनोज मील बतायो के काल ऑनलाइन स्लोगन होड़ राख्णी जावेला, जदके 18 मार्च ने महिलावां सारु जागरुकता संगोष्ठी राख्णी जावेला। वे बतायो के सप्ताहभर चालण वाळी गतिविधियां रे मार्फत ग्राहकां मांय वां रा हक ऊं जुड़ी जाग जगायी जावेला।

000

प्रदेश मांय आज पुलिस वाळा हरख-उमाव सागे होळी मनायी। जोधपुर रा पुलिस लाइन परिसर मांय पुलिस वाळा उमाव सागे होळी खेली। पुलिस कमिश्नर राजेंद्र सिंह अर पुलिस उपायुक्त आलोक श्रीवास्तव ई न्यारा-न्यारा अहकारां अर कर्मचारियां सागे होळी खेली। डूंगरपुर री पुलिस लाइन मांय राख्णी ज्यो होली मिलन समारोह मांय पुलिस वाळा एक-दूजा ने गुलाल लगा र होळी री शुभकामनावां दीनी। ई मौके लोक कलाकार सांस्कृतिक प्रस्तुतियां ई दीनी। झुंझुनूं जिला रा न्यारा-न्यारा पुलिस थाणां अर चौकियां मांय होळी खेली ज्यी। कोटपूतली-बहरोड़ मांय पुलिस विभाग रा अहलकारां सागे कारोबारी अर पत्रकार ई आयोजन मांय शामिल व्ह्या। पुलिस वाळा ई मौके रैली ई निकाळी, जिण रो न्यारी-न्यारी ठौड़ां स्वागत करी ज्यो। एस.पी.राजन दुष्यंत खबरनवीसां सागे बातचीत करता थकां पुलिस रा जवानां री होळी रे मौके दो दिन ताई मुस्तैदी ऊं ड्यूटी करण सारु सराहवणा कीनी।

000

कोटा जिला रा सांगोद मांय आज पारम्परिक न्हाण लोकोत्सव सरु व्हे रह्यो है। ई दौरान न्यारा-न्यारा स्वांग रच र हंसी-ठिठोली अर मनोरंजन सागे सामाजिक संदेश दिया जावे है। म्हाणा खबरनवीस बतायो के लोकोत्सव मांय काल चौधरी पाड़ा पक्ष री बारह भाला री सवारी निकाळी जावेला, जदके 17 मार्च ने राजसी ठाठ-बाट सागे बादशाह री सवारी निकाळी जावेला।

भीलवाड़ा जिला रा शाहपुरा मांय चाल रह्या फूलडोल महोत्सव मांय राम स्नेही सम्प्रदाय री ओर ऊं आज अणभैवाणी ग्रंथ री शोभायात्रा निकाळी ज्यी। पांच दिन रा ई महोत्सव मांय शिरकत करण सारू देश-परदेश ऊं जातरू पूग्या है।

000

आवता साल गणतंत्र दिवस रे मौके ऐलाण कर्या जावण वाळा पद्म पुरस्कार-2026 सारू नाम दाखिल करण रो काम आज सारू व्हे ग्यो। ई सारू नामांकन री आखिरी तारीख 31 जुलाई है। पद्म पुरस्कारां सारू केवल राष्ट्रीय पुरस्कार पोर्टल रे जरिये ऑनलाईन तरीका ऊं ई अर्जी दी जा सके है। पद्म विभूषण, पद्म भूषण अर पद्मश्री, देश रा मोटा नामी नागरिक पुरस्कार है। अ पुरस्कार खास कामां ने मान्यता देवण री कोशिश करे है। पद्म पुरस्कार कला-साहित्य, शिक्षा, खेल, चिकित्सा अर सामाजिक कामां समेत न्यारा-न्यारा हलकां मांय असाधारण उपलब्धियां सारू दिया जावे है। जाति, कारोबार, ओहदा या लिंग रा भेदभाव बगैर हर कोई आं पुरस्कारां सारू अर्जी दे सके है, हालांकि डॉक्टर अर वैज्ञानिक रे अलावा सरकारी कर्मचारी पद्म पुरस्कारां सारू अर्जी नी दे सके है।

000

राज्य मांय पश्चिमी विक्षोभ रा असर ऊं आज ई केई ठोडां बादळा मंड्योडा है अर बायरो बाज रह्यो है। कटे-कटे बिरखा व्हेवण रा ई समाचार है। हनुमानगढ़ मांय तेज बायरा सागे व्ही बिरखा ऊं नीचला हलकां मांय पाणी भर ग्यो अर ऊबी साखां आड़ी पड़ ग्यी। मौसम विभाग रे मुजब आज अर काल जयपुर, बीकानेर अर भरतपुर संभाग रा केई जिलां मांय बिरखा रा आसार है। आज अजमेर, अलवर, भरतपुर, दौसा, धौलपुर, जयपुर, झुंझुनूं, सीकर, बीकानेर, चूरू, हनुमानगढ़ अर श्रीगंगानगर मांय बादळां री गाज़ सागे बरसात व्हेवण रा आसार है। आवता 48 घंटां मांय घणखर ठोडां पारो 2 ऊं 3 डिग्री सेल्सियस ताई उतरण री संभावना है।

000